

**■ COLUMNA**


# Nagin anim da far festa

DA GIUSEP NAY

**J**au na vules betg trublur la festa a quels che vulan e san far festa per ils 100 onns Lia Rumantscha. A mi manca, per savair festivar, il spiert critic e cum-battant da quella envers las grondas mancanzas en la promoziun da nossa lingua materna, las qualas l'Uffizi federal da cultura ha stuì laschar analisar e metter sin maisa. Quai demussa che noss'uniun tetgala è dapi plirs onns pli administratura che promotura e defensiva dal rumantsch. Vegn latiers che gnanc quel rapport alarmant en plirs regards ha manà ad ina reaziun adequata.

**I**l privel è real che cunzunt las enconuschientschas dal rumantsch sa reduceschan vinavant, che main persunas d'instrucziun rumantschas vegnan scoladas e ch'il rumantsch svanescha plaun a plaun.» Quai constatescha il rapport e la LR n'ha da dir nagut latiers. Ella «è fitg bain en gamba», n'ha dentant tuttina betg la forza ed l'anim da far resoluziuns e protestas, gea, na vul betg far quai.

**T**ge vul ella alura far? Far programs senza guardar la realità è para sia devisa, essend ch'ella na sto betg esser da manavel dal pievel. Ella è uniun tetgala



che vul unir Rumantschas e Rumantschs, na prendant nagina posiziun sur l'adiever dals singuls idioms e gnanc pren pli en bucca il rumantsch grischun en quel connex. Quel lungatg unifitgà, sviluppà per unir la Rumantschia e per garantir sia preschientscha impurtanta sco lingua uffiziala chantunala e parzialmain era federala tenor nossas costituziuns, è vegnì surschà dal tut a populists fundamentalistics ch'han uschia gè lev da destruir il cuntanschì e da frenar dal tut il svilup, bain stà sfurzà memia spert e gigliard, il qual i vala perencunter vinavant da promover, sche l'unitad che dat sulettamain forza è anc ina finamira.

**Q**uai era sch'il rumantsch vul anc esser linguatg cumplain dal mintgadi, tar il qual la lingua administrativa giuridica ed era las communica-

ziuns e leschas impurtantas da chantun e confederaziun tutgan. Sch'ins vesa quantas administraziuns communalas da vischnancas rumantschas che na fan betg diever da quella purschida – che facilitass era da scriver en l'idiom local – e scrivan pli gugent tudestg, è la digren evidenta e maina a quai ch'ins sto era constatar adina dapli, ch'era persunas uschiglio cumplainmain rumantschas scrivan era mo pli tudestg. Il medem vala, per citar mo in exempel concret, suenter ch'ins sto constatar ch'er in uffizi dal cudesch funsil en il center dal terren da tschep dal rumantsch na fa ed importa encunter tuttas prescripziuns legalas explicitamain nagins contracts rumantschs.

**L**a devisa oz frequenta «Il romantsch viva, sch'el vul viver» ed il plashair da discurre rumantsch, che duai esser tut, n'ha en noss'istorgia mai tanschì e na tanscha er en il futur betg. Nua è il «Stai si defenda!» da Giacun Hapsper Muoth, pli actual che mai, davart da nossa Lia Rumantscha en general ed en spezial vis las cleras e grondas pretensiuns che ston vegnir fatgas surtut envers il chantun Grischun tenor las constataziuns bain fundadas dal rapport menziunà? Senza quai san ins malamain far festa.